

Rosas per schubregiadras

(gsc) Geneva, cun 187 295 olmas, è la segunda citad svizra suenter Turitg. «La Tribune de Genève» dals 8 da november 2012 ha rapportà in'atgnadad da sia citad: «La Voirie de la Ville ne peut pas engager de balayeuses!» Geabain, la citad na po betg finar femnas per scuar las vias la damaun. Motiv: L'uffizi da nettegiament da las vias n'ha ni gardarobas, ni duschas, ni tualetas per damas. Il schef – in um, quai s'englegia – empermetta correcturas entaifer dus onns. Ma privat(a)s han gia schubregiadas che levamarvegls vesan la damaun a lavurond avant butias cun scua u sdratsch. En la gasetta dal di «Le Courrier» (Genevra) dals 18 da zercladur 2013 stat la lingia grossa: «Des roses pour les nettoyeuses» (p. 5). La damaun dals 17, sin la Place du Molard, ha il sindicat Unia arranschà «in'acziun per far attent ils Genevrins a la greva lavur da quellas e quels che schubregian (...). En il medem mument sa splegavan acziuns sumegliantas avant l'ospital, (...) a l'eroport da Cointrin, en autras citads grondas svizas, ma era franzosas, spagnolas euv. José Sebastião, secretari sindical d'Unia: 'Prendai mo questa rosa per la regalar a l'emprim schubregiader u l'emprima schubregiada che vus entupais!'»

Immigradas en temp da crisa

Quai demussa respect e solidaritad per il

persunal da lez sectur. Per gronda part sa tracti d'immigradas che lavuran a temp parzial; nettegiar per ellas munta in portal per entrar en noss pajais. Per exempel Maria, gist arrivada da Portugal. Lezza lavura ussa per trais patruns differents, en total tschintg uras al di e sis dis l'emna, en lieus fitg sparpagliads en il chantun e cun uraris variabls: 'Jau entschaiv a las 7 e turn a chasa a las 21.' Ina situaziun fitg greva per ina mamma; per cletg gida in'onda (...). Las bleras emploiadas dal sectur lavuran a temp parzial, duas uras qua, duas là, cun entradas annualas sut ils 20 000 francs. Il pli savens na cuntanschan ellas betg il dumber d'uras pretais per ch'ins astgia pajar ina contribuiziun da provediment (...). Il contract collectiv da lavur en vigur a Genevra stipulescha in salari minimal da 18.20 francs l'ura (...). Cun mo trais inspecturs èsi fitg grev, tenor l'Unia, da cuntanscher l'applicaziun da lez contract. 'Varsaquants patruns han pli gugent in persunal da pliras persunas, perquai ch'il salari crescha sur deschedotg uras emnilas.'» Tant pli ch'ils inspecturs sindacals ston anc cumbatter il dumping da pajais, il qual po adina puspè succeder en in chantun cun blers cunfinaris, cunzunt tar relaziuns da lavur ad emprest. La crisa economica en l'Europa dal sid engrevegia l'incumbensa da tgi che duai controllar il respect da las leschas svizas da lavur.